



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :



Tir Yimiyim




tir_yimiyim



tir yimiyim

TAPAK 7



Vietnam Communist Party-i
assembly menden 97% shi akok



KKR pur Akash Deep-a
IPL masayatetsü

VOL. XXIII ISSUE NO. 159 (ADOK 159) DIMAPUR TENTONÜ (MONDAY) METSÜREMI (MARCH) 23, 2026

₹ 5.00

Assam CM-i Jagun nung police camp amakba aitsür

Guwahati, March 22, 2026

(Agencies): Tinsukia district kübok Assam Police Commando camp amakba khukhua aitsür ta Assam Chief Minister Himanta Biswa Sarma-i metetdaksüogo.

Jagun nung iba lendong atalokba sülen sepaitemi counter-insurgency operation ka tenzükogo aser iba mapa inyaktertem ozüing ajanga merenshitsu ta CM Sarma-i ashi.

"Iba tatalokba khukhua aitsür. Army aser Police-i counter-insurgency operation ka tenzükogo. Police tesepe amakertem pua arutsü" ta Chief Minister-isa ashi.

Iba lendong ya Jagun 10 Mile nung March 22 anepdang 2:00 ako meta atalok. Iba tesem ya Assam-Arunachal Pradesh arrtsü anasa lir.

Mejangjatetba nisungtemi commando camp amak aser grenades pungu shi amshia injang khaloktsü ta police-i ashi.

Iba commando camp nung aliba sepaitemi meyipa injang khaloktsü aser ghonda tasadang ka shi khatap. Mapang shitak nung sepaitemi mapa inyakba ajanga tesepe amakertem jena ao.

Iba tatalokba nung police commando pezü yiru aser pamok anameta medical facility ka nung anepalu.

Iba tatalokba atema ULFA (Independent)-i tenüing agiogo aser iba ya "Operation Bujoni" liasü ta metetdaksüogo.

Iba ya Assam Police anema "military action" ka liasü aser armed wing züingsemtem ajanga inyak ta ULFA(I)-i ashi.

2021 Assam Assembly elections sülen parnoki Assam Police anema maparen meinyaktsü telemtetba agia liasü. Ajisüaka, kümtem sepaitemi iba tangatetep alema ozü züingsemtem anema inyaksangshia arur ta ULFA(I)-i metetdaksü.

2021 aser 2023 tsüingda Assam Police-i ULFA(I) züingsem aika apu aser tepsetogo aser parnok pusemertem dak tenük yoka mapa inyakogo ta parnokisa ashi.

July 2025 nung Unified Command Structure kübok drone aser missile strike liasü aser idangji parnok tanishir aser züingsem aika tepset ta ULFA(I)-isa metetdaksü.

"Tang onoki tesepe amakba ya security forces kümdangtsü atema lir. Nenoki ozü züingsemtem aser pusemertem anema meinyaktsü ayongzüker. Nenoki inyakra onoki tayang küpzüktsü" ta ULFA(I)-isa ashi.

Northeast nung tsüingsang majungtsü

Dimapur, March 22, 2026

(Agencies): India Meteorological Department (IMD)-i Honibarnü linük ajungalen tsüingsang mopung atema tekümdangtsü metetdaksüogo aser iba nung Northeast nunga tsüingsang majungtsü shiogo.

Northeast India nung Manipur, Mizoram, aser Tripura nung yipru aita tzunglu arutsü aser mopung tesashi aontsü ta IMD-i ashi.

March 24 nü Assam, Meghalaya, aser Arunachal Pradesh nung tzunglu kanga arutsü aser iba mapang East aser Central India kübok tesem kar nung tzunglu arutsü aser mopung tesashi aontsü.

March 23 nü Nagaland kübok Peren, Dimapur, Phek, Wokha, Kiphire, Longleng, aser Mon kübok tesem kar nung tzunglu arutsü. Kasa anogo Kohima, Zunheboto, Mokokchung, aser Tuensang nungbo tsüingmok atena tzunglu arutsü ta IMD-i metetdaksüogo.

March 24 nü Peren, Kohima, Zunheboto, Mokokchung, Longleng, Mon, aser Tuensang

nung tsüingmok atena tzunglu arutsü aser Dimapur, Phek, Wokha, aser Kiphire kübok tesem kar nung tzunglu terara arutsü.

March 25 nü Peren, Dimapur, Kohima, Phek, Mon, aser Tuensang nungbo tzunglu arutsü saka Wokha, Zunheboto, Kiphire, Mokokchung, aser Longleng nungbo marutsü.

March 26 nü Peren, Dimapur, Phek, Kiphire, Mon, aser Tuensang kübok tesem kar nung tzunglu arutsü saka Peren, Dimapur, Phek, Kiphire, Mon, aser Tuensang nungbo marutsü.

March 27 nü Peren, Kohima, Zunheboto, aser Tuensang nung tsüingmok atena tzunglu arutsü aser Dimapur, Phek, Wokha, Kiphire, Mokokchung, Longleng, aser Mon nungbo terara dang arutsü ta IMD-isa metetdaksüogo.

March 28 nü Peren, Kohima, Phek, Wokha, Kiphire, aser Tuensang nung tsüingmok atena tzunglu arutsü aser Dimapur, Zunheboto, Mokokchung, Longleng, aser Mon nung tesem kar nung terara arutsü.

Koridang by-election atema candidate 6 lir

Dimapur, March 22, 2026

(TYO): Mokokchung district kübok 28 Koridang (ST) Assembly Constituency by-election atema candidate trok lir.

Parnok ya BJP aser PDA consensus candidate Daochier I Imchen, NPP candidate I Abenjang, Congress candidate T Chalukumba Ao aser Independent asem- Imchatoba, Imtiwapang Kichu aser Major (Retd.) Toshikaba nung lir.

November 11, 2025 nü MLA aser Information and Public Relations & Soil and Water Conservation Advisor Imkong L Imchen asüba ajanga by-election agitsüsa akümer aser Bharatiya Janata Party (BJP)-i asür Imkong'er jabaso Daochier I Imchen nem party ticket agütsü.

National People's Party (NPP)-i I Abenjang nem party ticket agütsü saka iba atema NPP

State unit nung mepetmesü ka adoka lir aser yashi NPP-i MLA & NPP Legislative Party Leader Nuklutoshi Longkumer nem showcause notice ka agütsüogo.

Külen, Nagaland Pradesh Congress Committee (NPCC) President aser Lok Sabha MP S Supongmeren Jamir-i yashi T Chalukumba Ao nem party ticket agütsüogo.

All India Congress Committee (AICC), party president Mallikarjun Kharge-i April 9 by-election atema T Chalukumba Ao tenüing mulung agizük ta Congress General Secretary (Organisation), K.C. Venugopal-i sangdong ka nung metetdaksü.

Maneni, Imtiwapang-i Independent candidate ka ama tokteptsü sangoktsüogo. Chungtia Village Council (Yimden) temoatsü bener iba by-

election nung pai tokteptsü ta March 20 nü Imtiwapang-i shiogo.

Maneni, Imchatoba Imchen-i NPF Central Youth Wing nung president mapa nungi anenogo aser pai Independent ka ama tokteptsü osang metetdaksüogo.

Tatamsa, 2023 assembly elections nung votes 276 agi asür Imkong L Imchen den tamakok anguba taoba NPF candidate Major (Retd.) Toshikaba-ia tan election nung Independent ka ama tokteptsü metetdaksüogo.

Ajisüaka, 28th Koridang Assembly constituency by-election nung tokteptsüpurtemi asüng, March 23 tashi nung tenüing agütsütsü aser March 26 tashi nung tenüing meyipa agitsü tetuyuba agüja lir, anungji item anogotem sülen ang candidate tem jangjatsü.

Congress-i menden 100 ayur; Alliance partners nem 26 lemzüktsür

Guwahati, March 22, 2026

(Agencies): April 9, 2026 nü Assam Assembly elections agitsü aliba atema Congress-i constituency 100 jungnüa nung tokteptsü aser tanüingba mendentem nung alliance partners anioktsü.

"Congress-i seat-sharing framework renemogo aser BJP anema votes angutsü mechi nung onok alliance partners nem menden 26 yutsür" ta Assam Pradesh Congress Committee (APCC) president aser Member

of Parliament Gaurav Gogoi-i ashi.

"Congress-i menden 100 jungnüa nung tokteptsü renema lir. Onoki alliance partners nem menden 26 lemzüktsür aser item nungi constituency ana nung friendly contest alitsü ta Gogoi-i ashi.

"Assam nung opposition longjemba ajanga political maparen melenshiogo aser Bharatiya Janata Party (BJP) asoshi tebilemtsü bentsür aruogo. BJP-i

tesüiba nung bilemba ama masü kanga melenshiogo kechiyong elections jakdang opposition ka kümogo" ta paisa ashi.

BJP-i opposition party tem longjemtsü ta mebilem liasü ta Gogoi-isa shisem.

"Opposition longjemba ajanga public tebilemba sayur. Iba ya Assam nung alirtemi aginüba liasü aser onoki ibaji akhümtsüba opposition longjemtetogo" ta paisa metetdaksü.

Manipur CM-i tatok agütsütsü aser amadoktsü ayongzüker



Manipur Chief Minister Yumnam Khemchand Singh-i osangbener den jembidang agiba niksa ka angur.

Imphal, March 22, 2026

(Agencies): Manipur Chief Minister Yumnam Khemchand Singh-i state nung tensa süngjemtsü atema tatok agütsütsü aser amadoktsü nüngdaker ta ashi.

Tawa Kuki-Zo Council den yimjung olemtep aliba indang

jembidang "temulung lemteptsü aser state nung teti atema yimjung bener arutsü asoshi iba senden ya tajung liasü" ta CM Khemchand-i ashi.

Manipur nung internally displaced persons tang tashi pei pei yimtsüngi meyipa mouteter aser iba tensa asoshi süoki ia

bilemer ta pai ashi.

"Nübertemi Imphal-Kohima highway (NH-2) nung senzütsü tsübuteper kechiyong tensa mesüngiem lir. Central forces-i nübertem kobika anüktsü? Kechi atalokogo iba asoshi asenoki tatok agütsütsüla aser amadoktsüla, yamaji asü nung dang asenok tejakleni aotsü" ta paisa ashi.

Manipur nung official buffer zone kecha mali saka security nükjidong atema tesem sensitive areas kar jangjateta lir ta CM Khemchand-isa ashi.

Narendra Modi-i state litsü nung mekongshitsü nangzükogo ta Manipur nung separate administration takhangba atema Chief Minister-i ashi.

Imphal-Ukhrul road densema tesem kar nung law & order tensa süngjemogo saka kati ka dak temulung alemba ajanga dang yimjung bener arutsü ta paisa shisem.

Lok Bhavan Kohima nung Bihar State Foundation Day amung Meghalaya nung KSU-i Vande Mataram anemer



Dimapur, Metsüremi/March 22 (TYO): Dr. Imkongliba Ao Hall, Lok Bhavan, Kohima nung March 22, 2026 nü Nagaland Angh Nand Kishore Yadav lia Bihar State Foundation Day munga liasü.

Nagaland Angh Nand Kishore Yadav-i iba sentong nung jembidang, state nung aliba Bihar nung dang pei maitsü aser sobaliba asoshi tejang tentetsü ayongzük. Bihar nung asüba ya region kasa nungi asüba kisung masü saka India linük yangluba nung shilem tulu agiba dena lir, ta ashi.

Bihar ya akhi alemli soyapokya, shisatsü aser tanüla tsütsü tetenzükdak lir, ta ashi. Bihar ya angazükdak tesem tajungtem asodak lir, kong Nalanda aser Vikramshila amala lapok, kong alima tesem balala nungi tashi temeteter tem adenshia azüing aser ibaji ajanga akhi mapang India ya tekolok-shisatsü nung lenir ka liasü ta temaitsü sayur, ta pai ashi.

India nung nüchiso meshiba mapang Bihar-i shilem balala agiba indang bilemteta jembidang, linük tia yangerba nung lenirtemi tongti shilem agiba aser bendanga agütsüba shia liasü.

State ya Buddhism aser Jainism densema tanülar tsütsü tesendaktep tajung lir aser iba nungi alima sünga tesunep aser non-violence indang osang prokshi, ta Angh-i ashi.

Linük tesem balala aser bendang lima Bihar nungeri wadang balala nung meranga inyakba ajanga linük ainba nunga maneni shilem agitar, ta ashi.

Pai Bihari nung dang item yimya wazüka ayutsü, pei tera den sendakteptsü aser tejakleni aotsü ajungmesoa liasü.

Bihar-i taoba mapang takok balala anguba ya linük ajanga ajungmesoa ka südaktsüsüla aser iba ama senmang tajung nung shilem ka ama ajaki benjonga tejak tentetsüla, ta Nagaland Angh-i ashi.

Pai Nagaland nung aliba Bihari nung dang state terenlok maparen nung shilem agitsü ayongzük aser sector balala nung meranga inyaka parnok indang skills, enterprise ajanga shilem agitsü ayongzük aser local nisungtem den jungtepa alitsü ashi.

Telungjem aser külemi khuret abentsü indang jembidang, iba ama inyakba ajanga Nagaland yimchiyimjung asoshi shilem tulu agir asütsü ta ashi.

Iba sentong nung Commissioner & Secretary to the Governor, Thavaseelan K, IAS-i pela agizükba o jembidang, iba sentong yagi Ek Bharat Shreshtha Bharat indang tanüla chichiba sayur, ta ashi.

Bihar ya shisatsü poktetdak tesem ka ama India sobaliba, shisatsü aser puti otsü tamendak dak yangerba nung tongti shilem agia lir ta ashi.

Iba sentong nung Advocate Y.P. Gupta, vice president, Nagaland Bihari Samaj ajanga Bihar State indang jembidang, kong Bihari nungeri shilem balala agi, Sonal Gupta aser medemer temi Bihar Mashup folk dance tsüngsanga liasü, Mahendra Sah aser Suman Kumar Modi nati sangro azüing, Ipshita Yadav-i tsüngsang ka agi shilem agi.

Kumar Gaurav-i Bihari folk song ka aten, Kavya Gupta aser teloki folk dances agi shilem agi aser Arohi Gupta aser Pradipta Chakraborty nati Jat-Jatin dance agi shilem agia liasü.

Sentong tambanga Fuirhesie Nyuwi, NCS, Joint Secretary to Governor ajanga melepzüing o jembidang aser Bihar Angh Lt. Gen. Syed Ata Hasnain (Retd.)-i salem o jembidang video ka sentong nung sayua liasü.


Shillong, Metsüremi/March 22 (Agencies): Tawa

Centre nungi totuyuba agütsüba mechi o intepba tali akumba mapang ka nung Khasi Students' Union (KSU)-i Vande Mataram ken ajunga atenba schools aser sorkar sentong nung longkak aittsü amokmerenogo.

Iba kaketshir telok yagi, iba ama tesem jangjatsü atema züingsemtem yoktsü aser longkak aitba ayongzüksü ta ashi aser iba national song tekong tatemlen Hindu nung sünghyangu jazükba lir aser ibaji indigenous tribal tamangba aser yimsü den mapet ta ashir. Iba ken tekong mezüingbuba ana nung dang tetsü tasoli athishia lir aser tanüingba tekongtem nung tamangba yimsü indang jangja-jangja shia lir, ta KSU-i ashir.

Iba sangdong ya KSU küm 48 ajungba sentong ka nung Donald V Thabah-i 'cultural assimilation' nokdangtsü atema iba mera ya agir, ta ashi.

"Asenok dang iba ken atentsü totuyuba agütsüdaktsüra, künü anogo asenoki item ojang nung kongshitsüsa akumtsü," ta Thabah-i taoba mapang iba ken o ya Hindi oshi amshidaktsütsü meranger ta angatetba,



Citizenship Amendment Act (CAA) aser Uniform Civil Code (UCC) den sendakteptsü.

KSU-i lisopor maitsü aser telungjem wazüka ayutsü asoshi nokdaka lir aser tribal nisungtem nem sobaliba danga mamshidaktsüsüla, ta KSU tir Lambokstarwell Marngnar-i ashi.

Ministry of Home Affairs (MHA) nungi totuyuba ka nung Bankim Chandra

Chattopadhyay-i mejemba ken Vande Mataram tekon trok prongla adentsü ashiba sülen iba ya ataloker. January 28 nü totuyuba agütsüba nung, National Song aser National Anthem anaprong atem dang/atendang, National Song ya mezüing atemtsüla/atentsüla ta shia lir.

Nagaland nunga iba ken o temai adoka Naga Students' Federation-ia anema nokdaker.

Nagaland nung kentenba sempet lir: Javed Akhtar

Kohima, Metsüremi/March 22 (TYO): Chairman, Indian Performing Right Society (IPRS), Padma Bhushan Javed Akhtar-i Northeast India nung music rights awareness tashi itshitsü atema March 21, 2026 nü Kohima nung IP Hub ka semzüktsüogoo.

Iba Hub ya IPRS-i amenok aser Task Force for Music & Arts (TaFMA) ajanga teyari agütsür, koba facility centre ka lir, kong IPRS membership enrolment support, work registration & Matadata management aser music rights and royalties indang osang agütsütsü.

Akhtar aser Padma Bhushan Shabana Azmi (Actor) den Creator's Meet & Interaction sentong ka Kohima anasa Regional Centre of Excellence for Music & Performing Arts (RCEMPA), Jotsoma nung agitsü lia iba IP Hub ya semzükba liasü.

Akhtar aser Azmi nati Nagaland nungi ken mejemer, ken zülur, independent artists, educators aser influencers den sensaksema liasü, kong Abu Metha onir liasü.

Iba sentong ya Task Force for Music & Arts (TaFMA) Nagaland ajanga IPRS aser Investment & Development Authority of Nagaland (IDAN) den lungjemer ayongzükba liasü.



RCEMPA, Jotsoma nung March 21, 2026 nü "Creator's Meet & interaction" sentong agidang tangokba noksa ka nung Javed Akhtar, Shabana Azmi aser Abu Metha nungertem angur.

Azmi-i Nagaland tang mezüingbuba semdangba indang jembidang, "Küm ishika jakdang Hornbill Festival nung adentsü Javed aruba sülen ni yagi arutsü kanga yongya liasü. Pai iba indang kü den kanga jembia liasü. Aser nia yangji temulung agütsü," ta ashi.

"Onok meyipa aodang Nagaland shilem tilaka onok mulungjang nung bener aotsü. Anungji nenoki temeim sayuba atema kanga pelar," ta lai ashi.

Küm ter tejakdang Hornbill Festival semdangba bilemteta jembidang, Nagaland ya tebour ajungba kisung masü, yangji nüburtem tebour tajung lir aser Naga nung ya temerek, tajung aser tongmelang lir, ta Akhtar-i

ashi. "Parnok tebenja mali, parnok nisung tajung. Aser alima nung tulutibaji aji lir," ta ashi.

Taküm Hornbill Festival nung adentsü atema parnok den "Bhaag Milkha Bhaag" actor Farhan Akhtar arutsü asü ta asüing dang, iba mapang pa shooting melira pa pelaseta arutsü, ta Azmi-i ashi.

"Nagaland nungi oa India, Delhi, Mumbai nung mapa inyakba indanga kibur temi mapa inyaker tajungtibaji parnok lir, parnok ochishir, parnok meranga inyaker aser temulung agüja inyaker lir ta küdang ashir," ta Akhtar-i ashi.

Nagaland ya music asoshi temu lir, aser IPRS ya sorkari

recognise süa lir aser ken mejemer aser lyricists asoshi inyaker.

Nagaland aser North East region indang otsü ya aiben shidak mashir aser meshidak angateter, ta Akhtar-i ashi.

Mainland aser iba tesem tsüingta tawa aliba raksatsü asoshi cinema, music, literature, arts aser activism nung sempet amshitsüla, ta pai ashi.

Ken yagi passport aser visa menüingdaker aser onoki Nagaland nungi sempet tajung alirtem den lungjemer inyaktsü aser ibaji ajanga ajak ajangzüksü, ta ashi.

"Ken atener, ken zülur, ken mejemer kar Mumbai-i arutsüla aser yangji anogo ter

mesüra hopta ka session agia külemi inyaka ken tasen yanglutsü," ta Akhtar-i ashi.

Azmi-i Film & Television Institute of India nung lanuwa inyakba indang jembidang, "Ni best actress, best student in acting nung gold medal angu. Ni kanga tia taka, kechiaser iba mapang ni 70s mapang tetsüing ajemokdang Film Institute nungi arurtem film industry nung kanga kera aniok," ta lai ashi.

Azmi-i la student asüba mapang film ana asoshi zülutepa "Ankur" film nungi tenzük aser iba sülen lai National Award for the best actress sempet angu ta ashi.

Iba kasa film ya Berlin International Film Festival tashi ao, ta Azmi-i ashi.

Mezüing ni Shashi Kapoor den külemi inyaka tenzük aser pa den Fakira film tangoka aji nungtugu akum, ta ashi.

Azmi-i cinema nung Shatrugan Sinha, Danny Denzongpa, Kader Khan, Sanjeev Kumar, Rajesh Khanna, Rishi Kapoor nung den inyakba indanga lemsatepa liasü.

Iba sentong nung TaFMA chairman Theja Meru menden liasü aser IPRS CEO Rakesh Nogam aser tongtipang nisung aika sensaksema nung shilem agia liasü.



March 22, 2026 nü New Delhi nung Ato kilonser, Narendra Modi leniba nung tongti ketdangsertem senden ka amendang tangokba noksa nung angur. West Asia nung rara ajanga petrol, gas, power aser fertiliser sectors tsütsü timtem ajangshiba lemsateptsü atema iba senden ayongzüka amen.

EAM Jaishankar-i Iran Foreign Minister Araghchi den jembi

New Delhi, March 22 (Agencies): External Affairs Minister, S Jaishankar-i Iran Foreign Minister, Abbas Araghchi den Eid benjung salem lemsatep aser pa den West Asia nung rara dak sendakba nung o lemtepego.

Jaishankar-i X ajanga, "Tanü nikongdang Iran Foreign Minister Araghchi den jembiogo. Pa den Navroz aser Eid salem lemsatep. Künati tang rara adoka aliba dak sendakba nung o lemtepa liasü," ta metetdaksü.

India nung aliba Iran embassy-i ashiba agi, Araghchi-i Persian Gulf aser Strait of

Hormuz nung tensa majungbaji region nung rara ajanga lir.

Araghchi-i, iba ya United States aser Israel nati ambangyima inyakba agi lir, ta ashi.

Iran foreign minister-isa, "Ambangyima inyakertemi ambangyima inyakba anen nung ang tensa süngjemtsü, iba denji külemi rara anentsü atema tarutsü nung ambangyima meinyaktsü atema nangzüksü nungdak," ta metetdaksü.

Tamalen Ato kilonser Narendra Modi-ia Iran Tir Masoud Pezeshkian den jembiba den külemi Eid benjung salem lemsatepa liasü.

Tekolak menden nung talangtiba tenzüksangji PM Modi kümogo

New Delhi, Metsüremi/March 22 (Agencies): Nüburtemi shimba sorkar tekolak menden ka nung mapang talangtiba tenzüksangji Ato kilonser Narendra Modi kümogo.

Nüburtemi shimba tekolak menden nung mapang talangtiba tenzüksangji taoba mapang Sikkim nung Chief Minister inyakasang, Pawan Kumar Chamling liasü; pai anogo 8,930 tashi chief minister inyaka liasü, ajisüaka tangbo Modi-i pa ajatetogo.

Narendra Modi Gujarat nung Chief Minister inyakba aser Ato kilonser inyakba anogo ajak

senteper 8,931 jungogo, aser tang küm 25buba nung ayaokogo.

Ato kilonser Modi ya Gujarat nunga mapang talangtiba Chief Minister inyakasang lir aser Chief Minister mapang talangtiba inyakba sülen Ato kilonser akümsangji-a pa lir.

India nung nuchiso anguba sülen mezüng asoba Ato kilonserji Modi lir aser Lok Sabha elections nung asemben tongkanga (2014, 2019 aser 2024) takok angusangji pa lir.

Narendra Modi ya mezüng 2001 küm October 7 nü Gujarat Chief Minister aküm aser 2014 küm May 21 tashi Chief

Minister inyaka liasü. Pa küm 13 tashi chief minister inyakba sülen national politics nung ajemoka liasü.

2014 küm May 26 nü Modi-i Ato kilonser tenangzüka agi aser Congress masüba lenirtem rongnung Lok Sabha nung full majority anguba lenirji pa lir.

Tan ita Modi indang YouTube channel subscribes million 30 jungogo aser alima nung nungtugu lenirtem rongnung pa densema lir.

Taoba ita (February) Instagram nung Modi followers million 100 jungogo.

Tang X nung Modi indang followers-a million 106.4 lir.

Jharkhand state sorkaria G-RAM-G magizüker

New Delhi, March 22 (Agencies): Linük nung state aikati G-RAM-G anema ola adokba mapang nung Jharkhand state sorkaria G-RAM-G masü saka MGNREGA scheme dang benoktsü atema bangzüng ka renema agizükogo.

Tamalen Karnataka, Kerala, Telangana aser Punjab state temia state assemblies nung G-RAM-G anema bangzüng renema agizükogo.

March 18 nü Jharkhand Assembly nung budget senden tatembangbuba anogo nung G-RAM-G masü saka MGNREGA scheme dang maneni benoktsü atema bangzüng ka renema voice vote ajanga agizükogo.

Jharkhand state assembly-isa Centre sorkar nem-a temepishiba ka agüja iba scheme memelenshitsü atema mepishitsü telemteba agi.

Assembly nung iba onük nung o lemtepeba mapang nung Jharkhand Rural Development

Minister, Deepika Pandey Singh-i, MGNREGA ya sensakertem aser yimtsüngtem nung mapa inyakertem taküm alitsü atema lir, anungji iba ama scheme nung tetsükdaksü agütsübaji magizüktettsü, ta metetdakja liasü.

Laisa Centre sorkar dang MGNREGA scheme kübok aayangtsü atema anogo 100 lezmükja aliba nungi anogo 150 kümjang, ta mepishi.

Laisa, iba ozüng ya memelenshitsüla, ta ashi.

Centre sorkari Mahatma Gandhi National Rural Employment Guarantee Act (MGNREGA) nungja agi VB-G RAM-G - Viksit Bharat Guarantee for Rozgar & Ajeevika Mission (Gramin) (G-RAM-G) ta melenogo.

Centre sorkari iba nungja melenba sülen Congress party dang masü saka BJP sorkar maliba state tem aser mongintemi scheme tasenba anema ola adoker.

Iba nungja tasenba kübok state teimbakati iba scheme kübok senotsü shilem 40 agütsütsüsa akümstsü, aser ibaji ajanga senotsü tsütsü timtem ajangshiba state tem nungbo iba scheme ya junga mebenoktetttsüa akok, ta mongintemi ashir.

Tamalen MGNREGA kübok senotsüji Centre-i shilem 90 aser state temi tanungba shilem 10 inokja liasü (90:10 ratio). Ajisüaka tangbo ratio ji 60:40 kümogo.

Iba dak alia anogo 60 nü "mapa meinyakba window" benokogo; tetezü mapa inyakertemi aluyimba mongpu ita ana nungbo mapa inyaktsü atema takhangba agütsütsü makok.

G-RAM-G benokba sülen Jharkhand Chief Minister Hemant Soren-i centre sorkari MGNREGA kübok state nem tagütsütsü aliba sen crore aika magütsüba atema Centre aija liasü.

Tamil Nadu nung TVK-i DMK-i aniba SPA teloktep toktsüogo

Chennai, March 22 (Agencies): Tamil Nadu nung DMK-i aniba teloktep nung densema alliba Tamilaga Vazhvirimai Katchi (TVK)-i SPA teloktep toktsüogo, ta Amongnü party tentetsang, T Velmurugan-i metetdaksü.

Panruti (Cuddalore district) Assembly nungi MLA, Velmurugan-i, DMK-i par party sendoker aser ambangyima inyaker, ta metetdaksü.

"Menden lemsaba mapang nung onok dang 'nenok nem

menden ka dang lezmüktsütsü' ta ashi," ta Velmurugan-i osangbenertem nem metetdaksü.

"Ni sorkar dang, onoki akhangbatem rongnung kar danga atalokjang ta aiben shiogo. Ajisüaka DMK-i onok sendoker," ta pai metetdaksü.

Paisa, TVK-i Tamil Nadu nung NDA teloktep nung madentsü, ajisüaka party kar den longjemer teloktep ka tentettsü atema jembidar, ta metetdaksü.



March 22, 2026 nü Nadia nung Ranaghat Uttar Paschim constituency nungi TMC candidate, Tapas Ghosh-i West Bengal Assembly elections atema nüboyimdang tangokba noksa nung angur.

Delhi nung ozüng alema inyaker 60 dak tali apu

New Delhi, March 22 (Agencies): Northwest Delhi kübok Rohini nung anogo pezünü tashi ozüng alema inyakertem mita aoba mapang nung police-i nisung 60 dak tali puogo, ta Amongnü police-i metetdaksü.

March 18 nungi March 21 tashi police team 44-i tesem 79 nung ozüng alema inyakertem mita aoba mapang nung nisung 60 dak tali apu.

Ozüng alema prangpong amshiba dak sendakba nung police-i ken o 10 benokobo aser nisung 11 puogo; parnok ket nungi .32 bore pistol ka, country-made pistol pongu,

cartridge 12, kotari pezü aser scooter ka apu.

Ozüng alema yi shibelenba dak sendakba nung Excise Act kübok ken o 14 benok aser nisung 14 apu. Police-i ozüngi memelaba yi pongdang 48 den yi quarter pongdang 13,993, gari ka, tempo ka aser scooter ka apu.

Sen asayaba dak sendakba nung ken o 11 benok aser nisung 34 apu; parnok ket nungi sen 30,380 apu. Iba dak alia rakzükrakter ana apu aser tena ket nungi auyaba mobile phone ka aser scooty ka apu. Ano gari auyar ka ket nungi motorcycle trok apu.



March 22, 2026 nü Lucknow nung Samajwadi Party National Tir Akhilesh Yadav, party MP Dimple Yadav aser tangartem 'Mahila Samman Samaroh' sentong nung tangokba noksa nung angur.



TIR YIMYIM YIMOBILEM (EDITRIAL)

DIMAPUR MONDAY, FEBRUARY (METSUREMI) 23, 2026

Asenok amoksepdaktsüdagi

Yakanü Muslim nunger Eid-ul-Fitr benjong anogo nung Nagaland nung asenok alidak town-tem nung dokan aika shibanger azüng-azünga akümba ngua asenok aika aoksar alitsü aser iba jagi asenok dang asen lima nung asenok tangar kübok aliba tensa tia ka sayur. Aji oda, küm shia alima ajaklen Muslim nungertemi ita junga anüngdang mapa inyakyonga tzüa mejemi lumia inyaker aser aonung anü ir külen aser anü matokdang dang chia ajemer. Iba itaji parnok asoshi temeshi ita lir aser iba temeshi ita tembangba anogo nung parnoki benjong tulu ayongzüka pelateper, iba benjong dangji Eid-ul-Fitr ta ajar. Atangji, iba benjong ya akhi tejen putu nung Tsüngremi Abraham dang par jabaso tambusang Pa nem tenla agütsüsü asoshi asüngdangba otsü nungi tenzüka sentong ka lir. Iba tamangba dak sentakba otsüji tanü yangi melemsar, saka iba anogomung nung asen lima nung Muslim nungertem aliba nütsüng aser parnok ket nung akaba rongsen jenjangji asenoki meteter. Aji oda, ita junga lumiba anogo tembangba benjong Eid-ul-Fitr anepdang Muslim nunger sarasadem agiba sentong nung adenertemji reprangdangra, asen lima yaa Muslim lima amai bilemstsüsa, sarasadem agidak moapu nung nisung ajir majijem adenshia angutsü. Ibaji asenok atema asen tarutsü tia majunga ta jara nung zülua sayuba tamaitüsü ka asütsü. Item Muslim nungertemji teimbaka Bangladesh nunger agi Assam nunger kümer arubatem lir aser parnokji par lima nung talidak peria maka aser taküm lia aotsü asoshi mapa inyakdi asüyonga mapa maka, anungji parnoki mashi tesem ka nung mashi mapa ka inyaka taküm alitsü akoker. Aji oda, itemji asenok asoshi kanga nungdaka aliba purtem amai asenoki agizüker, kechiyong asenoki mapa meinyakner aser parnoki mapa kanga inyakner. Ibayongji, asen ki parnoki yanglutsür, asen lu parnoki yimtsür aser shishilemdaka secondhand süoshi nungi tenzüker electronics oset, tsüngsem, chipo aonpo aser shi ango ajak parnok dang nungi asenoki alir. Aji oda, asenok ita sen , ayangba sen aser mapa meinyaki anguba sen ajak to Marwari aser Bihari nungertem nem agütsür anüngba sen ajak Muslim nunger nem agütsür. Iba jagi Parnok kar Rajasthan, kar Bihar, kar Assam aser karbo Bangladesh nung dena pei kiojen yanglur aser alua tululu ayimer. Aji oda, asenok sen ajak parnoki ruzüka ayutsü saka item jagi asen lima asoshibo angatibo kecha meinyaktsütsü. Tezüdangtsü aser asenok mulungdangtsü kaji, asen lima nung aruagi ayangba aser shishilembaba ajanga takar akümertem jagi pei kima anak-awa tilakata shia meindoktsü aser kilentzü merüka ayutsü melen, idakji anak okoka toktsütsü. Ibayongji, talisa Muslim nungertem aliba tesemji reprangdangra, parnok kiojenji mashimashi ka dang, memerük aser pai alidak tesemji meima aliba tamaitüsü tilakata mangutsü. Ano, parnok tebilemstsü agi asenok tebilemstsü akümstsüba mapa kaji, Muslim nunger tebur kati mapang kasa nung kinungtsü pezü ayutsü akoker, anungji kinungtsü pezüprong jagi tanur anana danga aso nunga tanur 8 bo asütsü, iba jagi Muslim nunger nütsüng züina aoer. Tanü India nung, asenok yabo yutsür, Hindu nunger shisabolu tulutibaji aji lir. Aji oda, asen lima nunga mapa inyakdak aser shishilembadak ajak nung Muslim nungertemi asenoki metetetmeteta asenok amoksepdagi. Atangji, tangbo parnoki asenok den yimten nung yimsüsüba menden merakteper, saka kodang parnok nütsüng agi asenok ajatetdir aser asenok dang nungi rongsen nunga parnok takarba kümdir, parnok tsüngdang asenok ola madoktetsü. Iba denji ano lia-lia asenok lisotsürtem aika parnok Muslim nungertem kiyii aoba ajanga parnokji asen anük-apang kümadokogo. Atangji, Muslim nungertem ya parnoki tashiyim amshia asen limai nungpoka aruba masü aser kazüa amongertema masü, parnok ya asenoki asen melen mapa inyakdaksütsü jaokba amaika kümogo, anungji asenok kazür aser parnok mazüngi mapa inyaker. Anungji, Laishibai ashi ama, asenokbo chiyongtsüa malang kümogo. Iba amaisa ao nungbo, asen lima nung memenui Jungli Mongsen dang nungibo Hussein o Ali nunger teimba akümstsü.

OLEMSABANG

Naga lima unemployment tebilemstsü

-- Imsumonga, CTC

(Yashi adok nungi...)

Tanurtem tejangraba aser teinyaknüba balaka, tsüraburi tuyuba khenyongi balaka ta iba lisü jagi alener tanü lanurtem aika lidar. Joko tsüraburtem tangatetba aser mulungsentsüa melentsüla mapang masü no! ta bilemer.

Külen nübujung aika mapa tila inyaktsü nema matangerji asen lanurtem aika mapa tulu, itasen tulu dang penzüa küm ka nungi ka ta süitema aodang tangarbo shi temang nunga tashimait bener saka anogoshia tepok sünga chana motor ka yanglua ayokba kisüng nungi pei pok sunga jangratema taküm alir. Sürabang lanurtema mera ka agia tejakleni arua mapa, itasen, income asadangba nungi adoka pei sempetji amshia joko pei tepok mesütsü mapang masü na? Mokokchung town nungi tenzüka jila teimba ka nung ku (hair) mejepdak dokan teimba ka tangar nisungi lapoka idakji asenok sen intoker. Aji anasatiba tatishitsü, kong, kechi tenzüksü asoshi sen aikabo menüngdaker. Ano ak metsüba, an metsüba, ango metsüba, sü arba dokan, shi alepba, sü atakba unit, shishilembaba unit balala aser yamala mesükba takoktsü aika lapoka mesüra tenzüka aoba ajanga nisung ka kija atema masü saka teyariteper/teinyaker kar anioka mapa bushiba nungi mapa agütsüba ka akümer. Tanü putu tasenba lanurtemi tamakoktsü ama kümdaktsüba aser ngudaktsüba tetsükdaktsütem ya ajangdanga noktaksü nungdaker. Nisung shia mesüra kibong shiajibo tsürabur takatait aser rongsen senmang melemzük saka tanü na aser ni taküm aser tia yanglushitsüba aser melenshitsüabajibo asen khuret asütsüla aser akoktsüla. Pei sasa tenzüka aser inyaka aotsüba maparen aika lir aser itemji bilemdanga inyaka aotsü mapang ka tongogo.

Sürabangla item ajak ya koma ajungmesoa inyaka takok ngua aotsü, mapa bushir taküm ka nungi mapai anioker, mapa agütsür ka koma akümstsü? Lanurtem tejangraba mapa küma takok nung tenzüka aser inyaka aotsü asoshi tebilemstsü ya parnok atema dang asü? Masü, iba nung ya kija, kibong, lokdi, arogoia shilem tila kabosa agitettsü koka lir. Küm shia budget nung inoka yur tejangrar lanurtem nem ya sen tetemlok makai pei pei maparen tenzüksü, amenoktsü atema agütsü nunga koma! Ano iba denji kulemi unemployed lanurtem asoshi seminar balala ayongzuka lenmang teyu nunga koma? Küm shia lanur ter danga yaria tenzük nung küm pungu nungbo aika renloka aotsü ta amanger. Achiajemtsü sobutsü maka mesüra masem yur sabangi arua shilem agiang ta ashitsü tamakoktsü masü na? Yaseta mesüra tzüraseta tanelajia tetibo tashi ita malitsü kechiaser taküm aser tanelaji sentaktepa lir. Lanur ka taküm jenjang noktaktetbaji lokti aser arogo a ajangzüker, ano lanurtema meranga inyakba ajanga tangar menepa pei nükjidong tongteta alitsüji koda jangratemtsü, entrepreneurship nung shilem agibaji temenen masü. Atangji, ibai nisung ka jenjang ajangketa taküm lenla ajak nung tashi idaktsüba nung shilem tulutiba asütsü.

Anungji, asen Naga lima nung lanur zünger kazür asoshi maongka lenmang lapoktsütsü asoshi lenirtemi iba amala reprangshima lanur ka asoshi taküm yanglushitsütsüji pei khuret ka ama bilema lenmang balala teyua mesüra bener arutsüra lanur taküm kija masü meimchir libaliru aser lokti kechisarena jenjang tajungketba nung renloka aotsü ta amanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chakhesang CRC Billy Graham-DBS Road Tenla ki semzükogo



March 22, 2026 nü Rev. Dr. Vevozo Khamo-i Chakhesang Christian Revival Church (CRC) Billy Graham-DBS Road, Kohima Tenla ki tasenba semzüksüdang tangokba noksa nung angur.

Kohima, Metsüremi/ March 22 (TYO): Amongnü Chakhesang Christian Revival Church (CRC) Billy Graham-DBS Road, Kohima Tenla ki tasenba meshiteta semzükogo.

NCRCCC Executive Secretary, Rev. Senuto Ringa-i nüngshilong sayatsü aser Arogo nung pastor, Rev. Dr. Vevozo Khamo-i Tenla ki meshiteta sarasadem.

Kasa sentong nung Arogo nung züngsemtemi ken ka aten.

Tsüngrem O jembidang Nagaland Christian Revival Church Council Chakhesang (NCRCCC) Tir, Rev. Zaseyi Veswuh-i Tenüngsang Ken 118:8-9 nung ajemdaker Tsüngrem dak tamang akatsü ayongzüka liasü.

Rev. Veswuh-i, "Kiojenji tongtibang, ajisüaka tamangertem dak temeim, ajemalu aser tamang ajanga dang atangji Tsüngrem sentsüwangshitsür," ta ashi.

Paisa Arogo nung züngsemtem dang iba Tenla ki ya sarasademba tesem ka,

azüngashiba aser tanela nung ainba tesem ka kümdaktsüsüla; iba denji külemi anogo shia Tsüngrem yimli bushitsüla, ta ayongzü.

Arogo otsü metetdakja Veswuh-i, iba Tenla ki renemba ya Tsüngrem tenanzükba atalokba lir, aser iba ya Arogo nung züngsemtemi nübo den tenla tajung agütsüba ajanga lir, ta ashi.

Paisa züngsemtem dang maneni Tsüngremi yimli atema tenla agütsüsü ayongzü.

Pastors & Deacons Association Tir, Pastor Sapi Puro-i salem osang lemsatop aser iba Tenla ki yangludang tenla agütsürtem dang pelaba lemsatop.

Church Development Board (CDB) senyur, Kropayi Dawhuo-i Arogo puti otsü metetdakja, tamendakdak ya 2014 küm October 14 nü tenzük aser mezüngbuba tekülem sentongji October 19 nü Kuhusayi Nyekha'er kidang agia liasü, ta metetdaktsü.

Iba sülen tekülem sentongji

tesem balala nung agia liasü; mapang ka nungbo taoba mapang minister Nieba Kronu'er kidang tekülem agia aru, iba sülen Kohima College nung agiba aser tang tesüsa Tenla ki renemogo.

Iba Arogo ya recognised fellowship ka liasü aser 2022 küm October 23 nü taoba mapang NCRCCC Executive Secretary, Rev. Z. David Koza-i Arogo ta official süa sangdonga liasü.

Tenla ki meshiteta semzükba sentong nung Church Development Board chairman, Lhoupekha Thasou-i lokti pelaa agizük, pastor Müdokhoyi Tünyü aser pastor Ngopelo Koza nati Lai azüng aser CCRC Upper PWD Kohima o CCRC Kohima-i ken ajanga shilem agia liasü.

Iba sentong ya Church Advisor Kuhusayi Nyekha leniba nung agi; sentong tenzük CCRC Upper PWD, Kohima senior pastor, Rev. Zhouhyüi Nyekha-i sarasadem aser Women pastor, Savino Thasou-i tenla meshiteta liasü.

Chhattisgarh nung Khristan kibong 28 nem ration magütsür

March 22, 2026: Chhattisgarh nung Khristan kibong 28 nem tesüba ita aika ration chiyungtsü magütsüba agi parnoki sorkar ketdangsertem nem takhangba agütsü, ajisüaka March 10 nü parnok dak azük, ta osang ka ajanga metetdaktsü.

Yaküm November ita nungi tenzük Sukma district kübok Millampalli yim dak village council chairman aser ration lemsüri Khristan kibong 28 nemji ration magütsü.

India nung ration system dang 'Public Distribution System' ta ajar. Iba inyakyim kübok sorkari Fair Price Shops nung BPL (below poverty line) kibong million 800 nem jenjang dalang agi jang, wheat, dal aser menjang balala agütsür.

Chhattisgarh nung Khristan kibong 28 nem

ration magütsüba ji senso ka temeden anema lir.

Millampalli yim dak Khristantem nem ration ita aika magütsüba agi taküm March ita tetenzüklen parnoki shidi ka ajanga district collector nem tashishiba metetdakja liasü.

Iba sülen district collector-i ibaji bushisüngdangtsü atema food inspector ka yim dak jagi yok, ajisüaka food inspector-i takoksa angur Khristantemji yaritsü melen Khristantem anema inyaksü atema yimdaklirtem ang ajungshia liasü.

Food inspector-i ajungshiba nung ajemdaker yimdaklirtem jagi Khristantem dakji azük. Iba video ji social media nung kanga prokshio.

Iba tatalokba sülen Khristan kibongtem jagi district collector aser police nem tashishiba aika

metetdaktsüogo.

Khristan kibongtem jagi, March 10 nü food inspector aruba sülen parnok mezüngmeshi aser Khristan yimsü toktsüsü atema tangartem rongshia liasü, ta metetdaktsü.

Food inspector jagi Khristantem dang, "Nenoki Yisu Khrista sülen anidakra nenok küm 8 tashi tepuokdak ayutsü aser Khristan yimsü metoktsüra nenok nem ration-a magütsüsü," ta metetdakja liasü.

Khristantem jagi, India temzüng kübok sorkari agütsüba ration angutsü atema Khristantem-a temsüa lir, ta shia parnok dak azükertem nem temerenshi agüjang, ta mepishi.

Khristantem parnok dak azüker nisung trok tenüng metetdaktsüogo.

ANOGO ABEN TSÜNGREM DEN

Teti Aliba Ochi

Kechiaser ochiji onok dak lir aser teti onok dak

alitsü. 2 Yohan:2

Kibuba Yisu Khrista, shibai ashi, "Ni leman, ochi aser taküm" (Yohan 14:6) Pa dak alema shinga ochi masü. Yohani züluba nung Ochiji tongtipang obang mapuba rong nung ka lir. Pai leshia tiyazü anema ochi alitsü jembai. Pa nütsüng tebang ajanga pai ochiba asoshi inyak. Pai ochi taküm aginer, aser libaliro aginer, ochi o agentsü, mesüra Khrista mapa nung talila kar bendenloktsüsü merangbaji nisung rongnung lir. Yohan-i tanelaren olangtepba kimong yangluba nungi tenzük. Ochi nung aibenlen mebendenloktsü pa kanga kümdanga liasü. Saka aibelen ochi karbo melar. Tsükchiri kanga taginütsü ka ratettsür kechiaser pa tiyazü nembangtsü asoshi pai tekülak ochi bendenloker. Tiyazü ochi agi nembanger ajaki agizükettsüsa sayur.

Ochi aser tiyazü bendangtsü asoshi obendanger ka ama asenok ket nung Laishiba lir. Laishibai kechi ashir? Ibai Tsüngrem O den meputepa iba nung ochi kar dena aliyonga aji magizüksüla. Züluba o aser taküm o anapronglaji ochi lir. Yohan-i asenok nem osang temeja ka agütsüba "Ochi, koba dak teti alir". Ibaji kanga taroki ia jembiba ka, aser ibaji jenokdak aser temoatsü tulu lir. Saka ochiba asenok dak aliba jagi asenoki asenok taküm nung pai mapa inyaksü asenoki pa nem nüji agütsür ta masü. Asenoki osangtajung nung amangba minute nungi Khrista asenok dak alir.

Khristan CEO kati England nung tenem talangtiba tashi Kangki apur atutsü

March 22, 2026: Release International CEO, Paul Robinson-i England nung tenem talangtiba 'Scafell Pike' tashi Kangki apur atutsü atema renemshidar.

June ita nung 'The Light Walk' omen kübok Robinson-i süngtsük agi yangluba Kangki taret ka aonung piyong tenem jagi apur atutsü aser anepdang tenem kolakji atongtsü.

Pa den volunteers kar densema alitsü.

Parnoki UK nung Khristantem dang alima tesem balala nung reshikangshi ajangshiba Khristantem atema sarasademjang, ta ayongzüko.

Metre 978 talang tenem kolakji atongtsü atema ghonda 3-4 shi agitsü.

Robinson-i, "Onoki Kangki taretji aonung piyong apur atutsü. Reshikangshi ajangshiba Khristantem pusema onoki Kangki aputsü," ta metetdaktsü.

Ibri 13:3 nung tepuokdak alirtem den nenoka ali amai tepuokdak alirtem bilemtetang, aser reshikangshi ajangshia

timtemertem ama bileman, ta shia aliba Lai o ajanga ajungmesoa parnoki Kangki apur tenem kolaki atutsü.

Robinson-i, "Onoki aputsü aliba Kangkiji onoki nguogo aser apudangogo. Kangkiji kanga taret, ajisüaka ibaji atangji tayongzüka lir. Khrista atema aser osangtajung prokba atema tayongzüka tulu ajangshirtem tia metettsü atema iba ya lenman ka asütsü ta ni amanger," ta metetdaktsü.

Anepdang anü adokba mapang nung team jagi tenem kolak nung Kangkiji asongtsü, iba sülen sarasadema tekülem agitsü.

Robinson-i, "Yisu tesangwaji remseptsüsü makok ta onoki sangdongtsü.

Kodang tenem kolak nung Kangkiji songdir onoki ola adoka sarasadema tekülem sentong agitsü. Alima nung tammangtiba tesemtem nung timtem ajangshiba adianutemi Yisu tesangwa maneni yadaktsür; parnok den longjema onoki tekülem agitsü," ta metetdaktsü.

AO OSHI ANGAZÜKDAK:

TANÜ ANGAZÜKTSÜBA OJANG



Walli

(n) süoshi aser nabong züing temerem kümdaktsütsü asoshi aremba mozü tzü (red dye made of plant)
* Walli nung aremba nabong züing rong nü nung enoka amshir.

Walok

(v) tsüingrem külema tenla agütsüba (sacrifice to god)
* Ariju nungertemi ariju tasen nashi ka tepseta walok.

OLONG PAITEP # 7452

15x5 grid for crossword puzzle #7452 with numbers 1-17 indicating starting positions.

TIPLIN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüingdang masü - (5)
14. Jabaso masü - (4)

OLONG PAITEP # 7451 TELANGZÜBA

TIPLIN :

- 2. Anükalem, 4. Mesak, 5. Apet,
9. Meimtep, 11. Posü, 12. Patak,
13. Tekettsü.

LANGTSÜNGLEN :

- 1. Kümdang, 2. Ayak,
3. Leptep, 6. Sati, 7. Yiar,
8. Sangküm, 9. Metsük, 10. Mazü.

NAI-A YA METETTER



Poland nungi matamabensar Sebastian Gorniak-i Guinness World Record ka yanglutetogo. Arishi küm 52 tain Sebastian-i men's MP4 category nung "longest voluntary breath-hold underwater" otsü yanglu. Pai tzü telong minute 5 ser second 41.9 tango mesashii litet.

Sebastian ya C6/7 spinal cord injury ajuru aser iba ajanga pa teka aser tetsüing marakzüteter.

Tanur asoba anogo nung salem osang den noksa angati adokdaktsünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimiyim bureau tem nung agüjang.

Arunachal-i 4th North East Games 2026 amungtsü asüingdangner



Itanagar, March 22, 2026

(Agencies): Arunachal Olympic Association (AOA)-i Indian Olympic Association (IOA) dang Arunachal Pradesh nung 4th North East Games 2026 amungtsü asüingdangnogo.

"Taküm January 9 nü Ahmedabad nung IOA Annual General Meeting amendang bangzüing renemba den putepa iba ya asüingdangner" ta AOA Secretary General Bamang Tago-i IOA President PT Usha dangi shidi ka zülüogo.

Iba bangzüing nung linük nung regional aser youth sporting sentongtem ajungkettsü lateta lir.

AOA-i October 10 nungi 17, 2026 tashi Itanagar nung North East Games 2026 amungtsü

atema Detailed Project Report (DPR) ka agütsüogo.

Ajisüaka, IOA, North East Sports Association (NESA), State Olympic Associations aser Arunachal Pradesh sorkar den asüingdangteper ang final dates shimtetsü.

North East Games ya saisapong sabang tongtipang ka kümogo aser iba nung northeastern state 8- Arunachal Pradesh, Assam, Manipur, Meghalaya, Mizoram, Nagaland, Tripura aser Sikkim ajanga shilem agir.

2026 asayamung nung priority sports disciplines 12 adentsü aser athletes, coaches, technical officials, support staff & volunteers, sports bodies &

government institutions representatives 4,000 tema shilem agitsü imlar ta DPR nung shia lir.

AOA-isa world-class standards agütsütsü atema senotsü teyari peria agütsütsü shiogo. Parnoki agütsüba budget nung infrastructure development, athletes & officials accommodation, competition management, transportation, medical services aser essential logistical arrangements dena lir.

2018 nungi North East Games ayongzüka arudang senotsü peria mangu saka state sorkartemi yaria takok ngua mungogo ta AOA-isa metetdaksü.

SSB DB-i election aser border security repringshim

Guwahati, March 22, 2026 (Agencies): Sashastra Seema Bal nung Director General Sanjay Singhal-i Assam nung Assembly elections atema SSB renema aliba meyipa repringshiogo.

Assam nung SSB ajanga India-Bhutan arrtsü anüker aser Singhal-i April 9 elections atema tongti ketdangsurtem den sendentem amen aser security maparen asadanga liasü.

Guwahati Frontier nung

Inspector General Sudhir Verma-i Guwahati airport nung Singhal pelaa agizük aser iba sülen pai Rangia nung Sector Headquarters semdang.

Idakji DG Singhal-i election duty atema lemzüksüba SSB nodal officers den senden ka amen.

Singhal-isa Udalguri district semdang aser idakji district superintendents of police den senden ka mena law & order maparen repringshi aser election

duty atema lemzüka sepaitem den sensaksem.

DG Singhal-isa India-Bhutan arrtsü nung Darranga-Samdrup Jongkhar trade transit route repringdanga liasü. Idangji pai Bhutanese ketdangsurtem den ajurutepa sensaksem aser Darranga nung Integrated Check Post repringdang.

April 9, 2026 nü Assam nung Assembly elections agitsü aser May 4 nü votes azüingtsü.

Guwahati Airport nung Terminal 2 (T2) ajanga maparen ulushir



Guwahati, March 22, 2026 (Agencies): Lokapriya Gopinath Bordoloi International Airport nung February 22 nungi lapoka amshiba Terminal 2 (T2) ajanga maparen kanga ulushiogo.

Iba terminal tasenba ajanga küm nung passenger handling capacity 13.1 million kümogo aser North-East nung Guwahati ya aviation gateway tongti ka kümogo.

Domestic carriers pungu

SpiceJet, Alliance Air, Air India Express, Air India aser Akasa Air tayimtsütem Terminal 2-i belenogo. Külen, IndiGo aser international flight services Terminal 1 nungi dang senzüdar aser mapang lemsar terminal tasenbai belentsü.

Terminal 2 nung technology-enabled passenger processing systems lir. Iba nung DigiYatra-enabled e-gates, self-bag drop counters, full-body scanners aser

automated baggage handling system densema lir.

Iba terminal tasenba terepringtsüji Assam nung sobaliba senmang keta lir. Terminal telunglen aou agi yangluba, orchid mesüka yangluba aser Assamese Japi nung ajemdaker noksatem enoka lir.

Iba terminal ya Adani Airport Holdings Limited ajanga yanglu. Parnok ya India nung private airport operator tulutiba lir.

Hopta ka nung Cuba power grid tanaben buba chirep



Cuba indang national electric grid chirepba mapang nūburtem Havana yimtung nung nung adenshia aliba noksa nung angur. Tang iba linük nung nisung million ter power mali timtemtar.

Havana, Metsüremi/March 21 (Reuters): Cuba indang national electric grid Honibarnü chirep koba hopta ka nung tanabenbuba chirepba liasü. US-i totzü bener maotsü atema tenokdangba agütsür aliba mapang tang iba timtem ya ajangshidar, aser communist sorkari nütsünyongsük million 10 atema light tsükloka metoktsüteti kümogo.

"18:32 (2232 GMT) nung National Electric Power System ajunga disconnect süja liasü. Onoki maneni osang agüja alitsü," ta state utility Union Electrica-i social media ajanga metetdaksü.

Honibarnü linük ajunga nung electricity makai akümbe ya tan ita tasembenbuba liasü, kechiyong March pezünüa

thermoelectric generating plant ka mapa minyaki akümbe sülen system timba ka inyaksangshi mesüi aküm. Power grid ya ano kuli kecha makai Hombarnüa ajunga shibanga liasü.

Cuba nung kümtem tsüngda iba amala timtem ya aiben ajangshia arudar, saka hopta ka tsüngda system anaben tashi kecha inyaksangshi mesüi akümbe yabo tang mezüngbuba lir.

Temesepta mozü shibelenba atema aija Venezuela tir Nicolas Maduro January 3 nü pua bener aoba sülen US tir Donald Trump-i Cuba dangi totzü kecha bener meyoktsü atema tenokdangba agütsü. Venezuela ya Cuba atema ajak dang tongtibangtiba linük ka liasü aser iba linük nungi totzü timba bener

arua liasü.

Iba tatalokba sülen Trump-i Cuba dangi Venezuela-i totzü yoka aliba anendaksü aser Cuba dang totzü yokra tenokdangba agütsü ta amokmerena liasü.

Venezuela sülenbo Mexico-i Cuba dangi totzü timba yoker, ajüsüa parnokia humanitarian teyari agüjaka totzü yokbabo anenogo.

U.S. aser Israel nati Iran amakba ajanga totzü jenjang aika akümbe mapang Russia indang totzü product tem malitsü atema tenokdangba agütsür aliba khen atema aginogo, saka iba küboki Cuba, North Korea aser Crimea maiter.

Cuba-i linük rongsenketzüng aser power grid chirepba ya US dak tai tonglokja arudar aser kasa mapang nung parnok tamakok anguba ya Cuba indang Soviet-style command economy benoka inyaksangshiba ajanga lir ta US-i shia arudar.

US o Israel nati power plants makra onoki region indang energy amaktsü: Iran

Tehran, Metsüremi/March 22 (Agencies): Tehran-i tongtipang Strait of Hormuz melapokra onoki par indang power plants amaktsü ta United States Tir Donald Trump-i amokmerenba sülen Iran-ia Middle East nung energy sites amaktsü amokmerenogo.

Iranian power plants makra region nung tongtipang ki o jen aser energy facilities meyanglutetsüsa raksatsüsü, ta Iran Parliament Speaker Mohammad Bagher Ghalibaf-i Deobarnü X post ka nung ashi.

"Ozü linük nung power plants aser ki o jen amakba den külemi region ajunga nung tongtipang ki o jen aser energy aser totzü indang ki o jen amaktsü tetemsü ta züngshitsü aser tanaben meyanglutetsüsa samatsüsü," ta Ghalibaf-i ashi.

Iran-i ghonda 48 tsüngta Strait of Hormuz melapokra US-i par indang power plants samatsüsü ta Trump-i Honibarnü ashiba sülen Ghalibaf-i iba telanzüba ya agütsü.

Iran indang facilities nung kongshira, region nung ki o jen "legitimate targets" akumtsü aser iba tayang kepzüka ya ajanga mapang talangka totzü jenjang timba alitsü, ta Qalibaf-i ashi.

Washington-i Iranian energy facilities nung tenük yokra onoki US shares den aliba company tem okshia samatsüsü aser US bases aliba linüktem nung energy facilities nung tenük yoktsü ozüng agi melar akumtsü, ta Islamic Revolutionary Guard Corps (IRGC)-i sangdong nung ashi.

US aser Israel nati February 28 nü nungi Iran amak tenzüka sülen parnok Strait of Hormuz

ya mokdanga liasü, saka US aser par tembar linüktem dak alaka iba tongtipang tzü lenmang ya lapokogo ta Tehran-i ashir.

Alima nung totzü aser liquefied natural gas (LNG) shilem pongu shi abenba tzü lenmang temesü ya shibangba ajanga 1970s sülen tang mezüngbuba oil crisis tamajungtiba adoka lir.

Iran-i drone aser missile amshia Israel den Jordan, Iraq aser Gulf linük balala dak amak, kong "US military assets" amaker ta parnok ashir, aser iba yongji nisung asü-amaba lir aser ki o jen raksaja alima nung markets aser aviation nung timtem agütsür.

Ajüsüaka tang tesüsa item sangdong ya ajanga tang hopta pezü buba nung aliba Middle East nung rara ya ano tensa tamajungba kati aotsü ama ajiteter.

Deobarnü Israel Ato Kilonser Benjamin Netanyahu-i alima nung lenirtem dang Iran den raraba nung US-Israel den adentsü ayongzü.

Israel south tsütsü Iran-i amakdak Arad yimti nungi jembidang, linük kar iba tsütsü ayamesogo ta ashi aser linük timba shilem agitsü ayongzüka liasü.

Iran-i civilian dak tenük yoker aser parnok dak Europe telung nung maktetsüsa tashi lir, ta Netanyahu-i ashi.

Kasa mapang Turkey Foreign Minister Hakan Fidan-i Iran Foreign Minister Abbas Araqchi, Egypt Foreign Minister Badr Abdelatty, European Union foreign policy chief Kaja Kallas aser US ketdangsurtem den iba rara tembangtsü atema mera agitsü asoshi jembi ta ashir.

Vietnam Communist Party-i assembly menden 97% shi akok

Hanoi, Metsüremi/March 22 (Agencies): Vietnam Communist Party-i National Assembly nung menden 500 aliba nungi shilem 97 shi akokba March 22-i parliament-i osang agütsüba nung shia lir.

Iba election ya Communist Party-i amokbanger agiogo aser candidate tem ya timba ruling party nungi dang liasü.

Party-i menden 482 akokba ya taoba election nung party-i menden akokba den kecha balaka tebandang mali.

Parliament züngsemtem aser local council atema küm pongu nung election ka khen agir aser taküm iba election nung voter 99% dak temai vote agütsüogo, ta ketdangsurtemi metetdaksü koba taoba election den mesükteper.

Unicameral parliament ket nung party-i tongtibang telemtetba agiba anema jenjang agitsü atema kecha tashi mali, saka parnok khenkhenbo ozüngtem yanglur.

National Assembly mezüngbuba senden April 6 nü nungi tenzüka hopta ka agitsü renema lir. Iba senden amenba mapang ozüng yanglurtemi party-i shima toktsür aliba lenir

tasentem shimtsü, kong Ato Kilonser aser Tir naprongla densema lir.

To?Lam, shiba Jnuary ita party indang congress nung general secretary asütsü shimshia liasü, pa nem tir mapa agütsüsü imlar.

Lam tir mendeni ajungkettsü aliba ya kidanger China den Vietnam political structure mesüktepa akümbe sayur, kong Xi Jinping ya Chinese Communist? Party indang general secretary aser linük tir lir.

Vietnam aser China na ya alima nung communist temi yimsü asüba linük ishika rongnung densema lir. Kidanger ana ya mapang talangka temulung melemtepi aruba den arrtsü nunga mangatettep adoka arudar, kong South China Sea nung tzü aser asetkong dak sendakba nung mangatettep aliba densema lir, ajüsüaka linük ana Communist party bo kanga junga sendaktepa lir.

Middle East nung rara adoker aliba ajanga alima shishilemba aser energy market dak kanga mejungi kongshir linük aika timtem nung aliba mapang ka nung Vietnam nung election ya tatembang ka dangi aruogo.

ALI AYOKER AT NIHOTO VILLAGE (NEAR 4 LANE) PLOT AVAILABLE @180/- Per Sqft. (Slightly Negotiable) Contact: 9612242850

GOVERNMENT OF NAGALAND
DIRECTORATE OF HORTICULTURE
 NAGALAND: KOHIMA
 NO.HR/DTE/ESTT-15/INTRV/2025/ Dated Kohima the 20th March 2026
ADVERTISEMENT

1. In pursuance to Administrative Approval No.HR/ESTT-2/RECRUITMENT/34/2025/540 dated Kohima the 30th Jan. 2026, clearance of P &AR Department U.O No. 1341, dated 23/01/2026 and concurrence of Finance Department RFC/ESTT No. 70/10 dated 30/01/2026, applications are hereby invited from eligible and indigenous inhabitants of Nagaland for filling up the under mentioned post under the Department of Horticulture in the manner prescribed below:-

Sl. No	Name of the Post	Pay Matrix	No. of Vacancy
1	Driver	Level-3	2 (two) posts

2. The minimum Educational Qualification required will be Class-VIII Passed.
 3. The age of the candidate shall be 21 -32 years.
 a. The upper age limit is relaxable by 5 (five) years in the case of candidates belonging to SC/ST.
 b. For serving Government employees, the upper age is relaxable equal to years of service served subject to a maximum of 5 years. In-service candidates should produce "No Objection Certificate" duly counter-signed by the concerned Head of Department with Name & Office Seal, along with initial date of appointment.
 4. 1(one) post is reserved for Chakhesang Tribe as per the existing reservation policy of the Govt. of Nagaland.
 5. Eligible candidates shall submit their applications along with the required documents namely: Valid Driving License/Aadhar Card/ Educational Certificate/ST/Indigenous Certificate/Birth Certificate/ Medical Fitness Certificate/Unemployment Card along with 2 (two) passport photos and contact number(s).
 6. Application forms shall be issued from the Office of the Directorate of Horticulture, Nagaland Kohima w.e.f. **24th March 2026** during the office hours on payment of Rs. 200/- (Rupees two hundred only) in cash as application form fee, which is non-refundable.
 7. The last date for submission of applications shall be **7th April 2026**. Applications received after the last date shall not be entertained.
 8. The date, time and venue of Driving Test and Oral Interview shall be communicated individually to the eligible candidates.
 9. Applications with incomplete documents or an expired Driving License shall be summarily rejected.

Sd/-
(AYIENO HIBO)
 Director of Horticulture
 Nagaland, Kohima

Orca aser ABC A nati 3x3 Memorial Basketball Tournament kokogo



Dimapur, Metsüremi/March 22 (TYO): Dimapur District Basketball Association (DDBA)-i ayongzüka JV Foundation Basketball Court nung asür Tiameren Amri (Technical Director) nüngtem nung Memorial Basketball Tournament ka ayongzüka asayaogo.

Iba asayamung nung tebur asaya final nung Orca-i TMB A akok aser tetsür asaya final nung ABC A-i Elite team koka liasü.

Taküm iba asayamung nung tebur team 8 aser tetsür team 4 ta asaya 40 nung kanga meranga toktepogo.

Tasembuba jenjang atema toktepba mapang tebur asaya nung Pogo team-i TMB B akok

aser tetsür asaya nung ABC B-i Don Bosco Sports Academy koka liasü.

Maneni tebur asaya nung MVP ji Orac nungi Tale aser tetsürtem rongnungi MVP ji ABC A nungi Nisino Nakhro liasü.

Asayamung shibangba sentong nung General Secretary DDBA Yudang Ao-i, asür Tiameren Amri'er kinunger, Trailblazer Society (trophy sponsors), Dorians Society, Longlangba Odangchetla Trust aser asür Tiameren'er medemertem dang parnok teyari asoshi kanga pelaba lemsatop.

Kinunger tenüng nung jembiba mapang Khomen Amri-i, "onoki Tiameren kanga

menungrar, saka item asayartem yagi pai iba asaya meimba indang bilemtetshidaksür. Maneni iba memorial tournament ajanga pa nem tetushi agütsüba atema DDBA dang kanga pelar," ta ashi.

Sentong nungsa Trailblazer Society nungi Moalong Jamir aser Dorians Society mendenbuba Meyiwabang Longchar natia asür Tiameren-i nem tetushi agüja jembiba liasü.

Asür Talimeren ya Nagaland nung basketball asaya atema tongshi tajung ka liasü. Pa DDBA indang Technical Director liasü. Pai iba asaya meimba ajanga asayartem aika ajungmesogo. Pai state team tem coach mapa dena inyakogo aser asayartem aika anitetogo.

Shanaka PSL toktsür IPL nung adentsü ana nung lir



Metsüremi/March 22, 2026 (Agencies): Taruba IPL atema Sri Lanka captain Dasun Shanaka Rajasthan Royals (RR) nung England nung all-rounder Sam Curran melena asayatsü ana nung lir.

Sam Curran yiruba ajanga asayamung nung masayatetsüsa akümba sülen RR pur squad melenshitsüsa kümogo. Iba sülen parnokiyakta dang Shanaka alizüksü atema jenjang agiogo aser source balala ajanga ashiba agi, pa den tenangzüktepba yanglutsü ana nung lir. Pa Pakistan Super League (PSL) nung asayatsü aliba ajanga paperwork kar tembanga

minyaki lir.

PSL nungi IPL nung asayatsü atema telemtetba agiba asayartem rongnung Shanaka-a densemogo. Tawa Zimbabwe pacer Blessing Muzarabani-i PSL toktsür Mustafizur Rahman melena Kolkata Knight Riders nung denogo. Iba ajanga IPL ya alima nung T20 league ajak rongnung nungtugutiba ka ta sayur.

RR pur taküm IPL nung mezüngbuba asaya Chennai Super Kings den ACA Stadium, Guwahati nung March 30 nü mezüngbuba asaya asayatsü.

"Shanaka taruba IPL atema RR nung adentsü asoshi sensaksemdar. Inyakyim ishika

tembanga inyakba sülenbo tenangzüktepba tembanga yanglutsü imlar," ta franchise ketdangsür kati IANS dang Deobarnü ashi.

Shanaka lenisüba nung co-hosts Sri Lanka pur T20 World Cup Super Eight stage nung tsük. WC nung Shanaka-i run 165 yanglu kong Pakistan den asayaba mapang ball 31 nung out mesüi run 76 yanglu aser paisa wicket asem agia liasü. Taoba December ita IPL mini-auction nung shingaia maliba sülen Shanaka ya PSL franchise Lahore Qalandars puri alizüka liasü.

Shanaka ya taoba mapang 2023 küm IPL nung Gujarat Titans nungi New Zealand batter Kane Williamson melena asaya, kong pai asaya asem nung run 26 yanglua liasü. Iba sülen pa 2025 küm Gujarat Titans purisa New Zealand batting all-rounder Glenn Phillips melena shim saka khen danga masaya.

Taoba mapang Sri Lanka nung nungtugu asaya Kumar Sangakkara ya Royals indang head coach aser taoba mapang India nung batting coach Vikram Rathour assistant coach lir. T20 World Cup mapang Rathour ya Sri Lanka indang consulting batting coach liasü.

KKR pur Akash Deep-a IPL masayatetsü

Metsüremi/March 22, 2026 (Agencies): Kolkata Knight Riders (KKR) pur pace bowler tem yiruba ajanga maneni tetsükdaksü adoker, kechiyong India nung pacer Akash Deep-a yiruba ajanga taruba Indian Premier League (IPL) masayatetsüsa kümogo, ta Cricbuzz sangdong ka ajanga Honibarnü metetdaksü.

Akash Deep ya Kolkata Knight Riders camp-i maru koba Kolkata nung March 18 nungi agidar.

Taoba mapang Harshit Rana-a T20 World Cup atema warm-up asaya ka asayaba mapang yiruba sülen taruba IPL masayatetsüsa küm liasü. Kasa mapang nung pacer Matheesha Pathirana-a asayamung tetenzüklen masayatetsü imlar.

KKR pur pre-season press conference nung jembiba

mapang Abhishek Nayar-i ashiba agi, Pathirana ya Sri Lankan Cricket Board kübok tang temang anepaluba mapang ka lir aser pa April tom nungi asayatsü temsüa akümsü imlar.

Taoba mapang Bangladesh nung left-armer pacer Mustafizur Rahman ya BCCI tetuyuba nung KKR puri chioka liasü. India aser Bangladesh na mangatettep adoker aliba mapang BCCI-i iba jenjang ya agia liasü.

KKR pur taküm IPL nung mezüngbuba asaya Mumbai Indians den March 29 nü Wankhede Stadium, Mumbai nung asayatsü. Iba sülen parnok Sunrisers Hyderabad den Kolkata kübok Eden Gardens nung April 2 nü asayatsü aser April 6 nü ano Eden Gardens nungsa Punjab Kings den asayatsü.

Miami Open: Sinner Eases, Mensik nati pei tata asaya kokogo



Metsüremi/March 22, 2026 (Agencies): Tang asaya aliba Miami Open nung Honibarnü Jannik Sinner-i takok ngua asayamung kanga junga tenzükogo, saka defending champion Jakub Mensik bo kanga meranga asayang mezüngbuba asaya koka liasü.

Indian Wells trophy akokba sülen anogo trok lir Sinner-i Miami Open kanga junga asaya tenzükogo aser pai mezüngbuba asaya nung Damir Dzumhur 6-3, 6-3 agi koka liasü.

"Mezüngbuba round asaya temela masür," ta arishi küm 24 tain Italy nung asayar yagi ashi, shiba 2024 küma Miami asayamung ya koka liasü.

Daniil Medvedev koka mezüngbuba Indian Wells title abenba sülen Sinner ya 2017 küm Roger Federer-i takok anguba sülen küm ka nung Indian Wells aser Miami ATP Masters 1000 title naprongla abenba asayar mezüngbuba akümsü merangdar.

Pai mezüngbuba set nung Dzumhur ya minute 34 nung dang akok aser tanabuba set nunga Bosnia nung asayar indang serve ka break süa pa 2-1 agi tejakdang aküm aser

asaya ayong ayonga koka liasü. Tebur kija asaya nungsa taoba mapang world number one asayar Medvedev-i mezüngbuba set bo makok saka pai Japan nung arishi küm 19 tain Rei Sakamoto 6-7 (10/12), 6-3, 6-1 agi koka liasü.

Mensik, shiba Indian Wells tasembuba round nung tsüka liasü, pai Australia nung Adam Walton den asaya junga metenzükto, saka tanungba set ana nung asendenshir tajungba asayateta 3-6, 6-2, 6-4 agi asaya kokogo.

Mezüngbuba set nung serve anaben tashi break südakja asaya makokba sülen Mensik-i asendenshir tanabuba set mezüngbuba game nung Walton indang serve break asü aser tasembuba set nunga pai serve ka break süa 3-1 agi tejakdang akümba sülen asaya akok.

Maneni Fourth-seeded Germany nung asayar Alexander Zverev-i 6-2, 6-4 agi America nung asayar Martin Damm koka tasembuba round-i iogo. Ajisüaka America nung eighth-seeded asayar Ben Shelton bo Kazakhstan nung asayar Alexander Shevchenko-i 6-7 (3/7), 7-6 (7/3), 6-3 agi tsükdaksüogo.

BILEMDANGANG

"Tangar den medemdangba kodang anendir idangji tepela tenzüktsü."